

KERATAN AKHBAR

TARIKH : 9 APRIL 2024
AKHBAR : SINAR HARIAN
MUKA SURAT : 30

Indeks Pengeluaran Perindustrian naik 3.1 peratus

Indeks Pengeluaran Perindustrian naik 3.1 peratus

KUALA LUMPUR - Indeks Pengeluaran Perindustrian (IPP) meningkat 3.1 peratus tahun ke tahun pada Februari 2024, didorong oleh momentum positif dalam kesemua sektor, menurut Jabatan Perangkaan Malaysia (DoSM).

Pada Januari 2024, IPP meningkat sebanyak 4.3 peratus.

Ketua Perangkawan, Datuk Seri Dr Mohd Uzir Mahidin berkata, pertumbuhan sederhana itu terutamanya berikutan pertumbuhan *output* lebih perlahan dalam sektor pembuatan yang berkembang 1.2 peratus berbanding 3.7 peratus pada Januari 2024.

"Namun, sektor perlombongan dan elektrik, masing-masing terus berkembang 8.1 peratus (Januari 2024: 5.0 peratus)

dan 10.9 peratus (Januari 2024: 8.3 peratus)," katanya dalam kenyataan pada Isnin.

Menurutnya, IPP merosot 6.3 peratus, berbanding positif 2.0 peratus yang dicatatkan pada bulan sebelumnya.

Tambah beliau, peningkatan 1.2 peratus dalam output sektor pembuatan pada Februari 2024 disokong oleh industri berorientasikan domestik yang berkembang 3.8 peratus (Januari 2024: 8.0 peratus).

"Pengembangan dalam industri berorientasikan domestik dipacu terutama oleh pembuatan produk logam fabrikasi



MOHD UZIR

kecuali mesin dan kelengkapan yang mencatatkan peningkatan 8.4 peratus.

"Ia diikuti oleh pembuatan produk-produk galian bukan logam lain (5.1 peratus) dan pembuatan kenderaan bermotor, treler serta semi treler pada 2.9 peratus," katanya.

Menurut Mohd Uzir, industri berorientasikan domestik merosot 7.5 peratus berbanding peningkatan 4.9 peratus pada Januari 2024.

Sementara itu, menurutnya, industri berorientasikan eksport kembali kepada jajaran negatif dengan penurunan kecil 0.1 peratus pada Februari 2024 berbanding

pertumbuhan positif 1.6 peratus yang direkodkan pada bulan sebelumnya.

"Penyusutan itu terutama disebabkan penurunan dalam pembuatan minyak dan lemak daripada sayuran serta haiwan (-13.5 peratus), pembuatan kimia dan produk kimia (-2.8 peratus) serta pembuatan kelengkapan elektrik (-2.2 peratus)," katanya.

Beliau menegaskan pengembangan 8.1 peratus bagi sektor perlombongan pada Februari 2024 dipacu oleh pertumbuhan 11.9 peratus dalam pengeluaran gas asli (Januari 2024: 6.6 peratus), manakala pengeluaran minyak mentah dan kondensat kekal dengan pertumbuhan kukuh 2.5 peratus (Januari 2024: 2.6 peratus). - *Bernama*